



**«ԻՆՏԵՐԱԿՏԻՎ ԿՐԹՈՒԹՅԱՆ
ԶԱՐԳԱՑՈՒՄ»
ՀԻՄՆԱԴՐԱՄ**



**ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ
ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ
ԴԱՍԸՆԹԱՑ 2022**

ՀԵՏԱԶՈՏԱԿԱՆ ԱՇԽԱՏԱՆՔ

ԹԵՄԱ Գլոբալացումը որպես համաշխարհային հիմնախնդիր

ԱՌԱՐԿ Աշխարհագրություն

ՀԵՂԻՆԱԿ Էլմիրա Կարապետյան

ՄԱՐԶ Շիրակ

ՈՒՍՈՒՄՆԱԿԱՆ ՀԱՍՏԱՏՈՒԹՅՈՒՆ «Բավրայի միջնակարգ դպրոց» ՊՈԱԿ

Բովանդակություն

Ներածություն-----	3
Գլոբալացումը որպես համամոլորակային հիմնախնդիր-----	4
Եզրակացություն-----	9
Օգտագործված գրականություն-----	10

Ներածություն

Յուրաքանչյուր հետազոտական աշխատանք կատարելու կարևոր պայմանը համարվում է հիմնախնդրի պարզումը: Հիմնախնդիրը գիտական հարց է, որը լուծելու համար հասունացել են օբյեկտիվ պատճառներ: Առաջ քաշելով հիմնախնդիրը հետազոտողը հաստատում է.1. տվյալ պահին առա ոչ բավարար գիտելիքների մակարդակը, որը պայմանավորված է նոր փաստերի և կապերի բացահայտման անհրաժեշտությամբ, 2. հասարակության նոր պահանջների առկայությունը, որն արտահայտվում է առկա գիտելիքների սահմաններից դուրս գալու և նոր գիտելիքներ ձեռք բերելու անհրաժեշտությամբ: Մեր կողմից դիտարկվելու է գլոբալացման համամոլորակային հիմնախնդիրը:

Հետազոտության նպատակի որոշումը բխում է հիմնախնդրից: Այսինքն հիմնախնդրի լուծումը ինքնին հանդիսանում է հետազոտության նպատակը: Հետազոտական գործունեությունն իրականանում է այն ժամանակ, երբ նպատակաուղղված է և դրդապատճառներով հիմնավորված: Ըստ էության նպատակը իր մեջ արտացոլում է հետազոտության մտահղացումը: Միաժամանակ պետք է նկատենք, որ նպատակի որոշման օգնությամբ միաժամանակ հետազոտողը պարզում է հետազոտական աշխատանքի իրականացման հիմնական ուղղությունները: Ըստ այդմ մեր կողմից, որպես հետազոտության նպատակ ընտրվել է գլոբալացման համաշխարհային հիմնախնդրի բազմակողմանի ուսումնասիրությունը և վերլուծությունը:

Անդրադառնալով հետազոտության արդիականությանը, շեշտենք, որ արդիական հետազոտությունները դիտարկում են այն հարցերը, որոնք առավել սուր հնչեղություն ունեն տվյալ ժամանակաշրջանում և ըստ այդմ պահանջում են հրատապ լուծում: Մեր ներկայացրած հիմնախնդիրը արդիական է, քանի որ նրա ուսումնասիրման և վերլուծության կարևորությունը արտահայտվում է մարդկային կյանքի բոլոր ոլորտներում:

Գլոբալացումը որպես համաշխարհային հիմնախնդիր

Մեր հետազոտական աշխատանքում մենք կոլեկտիվաբար գլոբալացումը, ներկայացնելով այն բացասական հետևանքները, որոնք առաջանում են այս համաշխարհային գործընթացի արդյունքում: Նախ խոսենք տնտեսության գլոբալացման մասին: Կապված դրա հետ, նշենք, որ փորձագետները գլոբալիզացիան սահմանում են որպես «աշխարհի երկրների աճող տնտեսական փոխկախվածություն, որի արդյունքում կատարվում է ապրանքների և ծառայությունների միջազգային գործարքների ծավալի և համաշխարհային կապիտալի շրջապտույտի աճ»[7, էջ98]: Մեկ այլ ձևակերպմամբ գլոբալիզացիան դա. «Ապրանքների, ծառայությունների, կապիտալի, աշխատուժի, գիտելիքի միասնական շուկա ունեցող համաշխարհային տնտեսության վերածման գործընթացն է: Լան իմաստով գլոբալիզացիան համաշխարհային տնտեսության բոլոր սուբյեկտների համընդհանուր փոխկախվածություն է, որը ձևավորվում է տնտեսական, քաղաքական, մշակութային, հասարակական կապերի բաց համակարգի պայմաններում, հիմնված ժամանակակից տեղեկատվական տեխնոլոգիաների վրա:»[4, էջ213]: Պատմական ակնարկ կատարելով համաշխարհային տնտեսության գլոբալացման ձևավորման ընթացքին, պետք է փաստենք, որ նրա առաջացման սկիզբ կարելի է ընդունել նախորդ հազարամյակը, երբ համաշխարհային տնտեսությունը նոր էր սկսել ձևավորվել: XIX-XX դդ. գլոբալիզացիայի ուժեղացումը հանգեցրեց համաշխարհային տնտեսության ձևավորման: Արդեն այդ ժամանակներում մասնագետները առաջ քաշեցին միջազգայնացում հասկացությունը, որը ենթադրում էր համաշխարհային տնտեսության մեջ երկրների մասնակցության աճ: Երկու համաշխարհային պատերազմների և 1930թթ.ականների տնտեսական ճգնաժամի պատճառով գլոբալացումը որպես համաշխարհային գործընթաց չկայացավ և միայն XXդ. կեսերին այն նորից թափ առավ: Գլոբալացման գործընթացում ձևավորվում են արտադրական, տեղեկատվական, ֆինանսական և նորորարական ցանցեր: Գլոբալացման ընթացքում կատարվում են, կապիտալի, արտադրության, նախաձեռնողականության ինտերնացիոնալացում: Նախքան դրանցանդրադառնալը, նախ ստուգաբանենք «միջազգայնացում» հասկացությունը: Մասնագիտական

գրականության ուսումնասիրությունը ցույց է տալիս, որ գլոբալացումը որպես տնտեսական կատեգորիա համաշխարհային տնտեսության մեջ երկրների մասնակցության ակտիվացումն է, իսկ արտադրական-տնտեսական ոլորտում կայուն միջազգային կապերի ձևավորումը հիմնված աշխատանքի միջազգային բաժանման վրա:

Անդրադառնալով կապիտալի միջազգայնացմանը, նկատենք, որ վերջինը ենթադրում է ազգային կապիտալների միավորման գործընթաց, որն արտահայտվում է տարբեր պետություններում տնտեսավարող սուբյեկտների կողմից ընկերությունների ձևավորմամբ: Ըստ այդմ նշենք, որ գործում են միջազգայնացման երկու մակարդակներ՝ 1. միկրոտնտեսական՝ կազմավորված գլխավոր և այլ երկրներում տեղաբաշխված դուստր կազմակերպությունների կապերով և 2. միջազգային՝ ձևավորված միջպետական կապերով (օր. Եվրոպական Միությունը):

Խոսելով արտադրության միջազգայնացման մասին, պետք է նշեն, որ վերջինը տարբեր երկրներում տեղաբաշխված ձեռնարկությունների միջև կայուն արտադրական կապերի ձևավորման միջոցով կապիտալի տեխնոլոգիական օգտագործման եղանակ է, որի արդյունքում յուրաքանչյուր երկրում կատարվող արտադրությունը դառնում է համաշխարհային արտադրական գործընթացի մի օղակը: Այս գործընթացը կարող է իր հետ բերել աշխատուժի շահագործման ռիսկեր:

Ներկայացնելով նախաձեռնողականության միջազգայնացումը, որպես համաշխարհային գլոբալացման ասպեկտ, պետք է նկատենք, որ վերջինը ենթադրում է արտադրական հարաբերություններ, որոնք զարգանում են կոնկրետ ֆիրմայի և նրա գործընկեր հանդիսացող արտերկրի կազմակերպության միջև կապված ապրանքների և ծառայությունների արտահանման հետ: Գլոբալացման սրացման արդյունքում նկատվում են հետևյալ բացասական երևույթները՝ ազգային ձեռնարկությունների մեծ մասը ունենում է սեփական շուկայի և ապրանքների վաճառքի հետ կապված սահմանափակումներ: Վերջինը նվազեցնելու, երկրների մրցունակությունը բարձրացնելու, արտադրության մասշտաբները ընդլայնելու միակ ուղին միջազգային չափանիշներին համապատասխանեցումն է: Տնտեսագիտության մեջ այդ գործընթացը ընդունված է անվանել ձեռնարկության գործարարության միջազգայնացում: Դեռ տասնամյակ առաջ գլոբալացումը կարծես միտում էր, որն

անհնար էր կանգնեցնել: Ապրանքների, կապիտալի, աշխատուժի, գաղափարների փոխանակումը աճելով, փոխակերպեց համաշխարհային տնտեսությունը: 1986-2018թթ. համաշխարհային առևտուրն աճել է ՀՆԱ-30%-ից մինչև 60%, իսկ օտարերկրյա ներդրումների աճը կազմել է 0,4%-1,4%: Վերջին տարիներին գլոբալացումը կանգ է առել, որը բացատրվում է արտերկրի ներդրումային հոսքի նվազմամբ: Առևտրի և ներդրումների աճը ունեցավ երկարատև ազդեցություն, հետևաբար շատ երկրներում գլոբալացման դադարեցումը կամ «ապագլոբալացման» սկիզբը դեռևս աննկատելի է: Այն մարդիկ, ովքեր տուժում են գլոբալիզացիայի հետևանքով ձգտում են պաշտպանել իրենց եկամուտները և ապրելակերպը կատարելով իրենց ներդրումները ներպետական արտադրության ոլորտում, հակադրվելով միջազգային կազմակերպությունների գործունեությանը: Այն, որ գլոբալացման աճը կարող է հանգեցնել ազգային ժողովրդավարության անկմանը, դեռ իր ժամանակին կանխատեսել էր Կարլ Պոլանին իր «Մեծ փոխակերպումը» գրքում: Իսկ Հարվարդի պրոֆեսոր Դանի Ռոդրիկը իր աշխատություններում, ինքնակառավարումը և գլոբալացումը համատեղ «անհնար եռյակ» են: Երկրները կարող են իրենց թույլ տալ երեք ինստիտուտներից միայն երկուսը, բայց ոչ բոլորը միանգամից[4]: Մասնագիտական գրականության ուսումնասիրությունը ցույց է տալիս, որ իրականում չի կարելի գիտական վերլուծություն համարել երկրների ՀՆԱ-ի շնչի հաշվով վիճակագրական արդյունքները ընդունելով, որ ժամանակակից աշխարհը միատարր չէ, մինչդեռ ժամանակակից աշխարհը գլոբալ չէ, այլ իրենից ներկայացնում է մոտ 200 տարբեր տնտեսական և սոցիալական զարգացում ունեցող երկրների սիմբիոզ: Այդ սիմբիոզը պայմանականորեն կարելի է բաժանել խմբերի.

- ✓ Ջարգացած կապիտալիստական երկրներ-որոնք արդեն անցել են ինդուստրացման փուլը
- ✓ Ջարգացող երկրներ-որոնք ձգտում են հասնել զարգացած երկրներին
- ✓ Վաղ կապիտալիստական զարգացող երկրներ, որոնք պայքարում են գոյատևելու համար (Լատինական Ամերիկա, Ասիա, Աֆրիկա)
- ✓ Թույլ զարգացող երկրներ, որոնք պայքարում են գոյատևելու համար
- ✓ Չախողված երկրներ, որոնք չեն կարողացել ստեղծել կայուն պետականություն(Failed states)[5]:

Եթե փորձենք ներկայացնել համաշխարհային տնտեսության մեջ երկրների տնտեսությունների դոմինանտության հիերարխիկ կառուցվածքը, կունենանք հետևյալ պատկերը (արտահայտված %-երով)[6]:

2010թ.	ԱՄՆ-13,3	Չինանաստան-12,3	Ճապոնիա-6,9
2030թ.	ԱՄՆ-10,1	Չինանաստան-18	Ճապոնիա-6,3

Ներկայացնելով գլոբալացման վնասները, կանգ առնենք դրանցից կարևորների վրա.

1. Բնական ռեսուրսների սպառման խնդիրը, 2. սպառազինությունների մրցավազքը, 3. զարգացած և զարգացող երկրների միջև առկա զարգացման մակարդակների տարբերությունը, որը միջազգային լարվածության և անկայունության աղբյուր է, 4. սննդի խնդիրը, որի արտադրությունը համահունչ չէ բնակչության աճին, 5. ժողովրդագրական խնդիրը (երկրի բնակչության թվի ավելացումը), 6. աղքատության խնդիրը, որը որոշ երկրներում ձևավորում է սով, 7. «աղքատ» երկրներից դեպի «հարուստ» երկրներ մարդկանց շարունակական տեղափոխություն՝ միգրացիան[7]: Թվարկածին կարելի է ավելացնել նաև միջազգային ահաբեկչությունը, թրաֆիկինգը, զանգվածային գործազրկությունը: Ռեսուրսների համար պայքարը կապված է այնպիսի երևույթի հետ, ինչպիսին է ժամանակակից միջազգային ահաբեկչություն: Տարածված կարծիք կա, որ տեռորը թույլերի զենքն է ուժեղների դեմ[3, էջ29]: Անդրադառնալով գործազրկության խնդրին, պետք է նկատենք, որ ավելի մեծ թվով կարող են ազատվել արտադրական գործունեությունից, չիմանալով թե, ինչպես կարող են իրենց ազատ լրացնել ժամանակը: Գործազրկության խնդրին անդարադարձել է Ի. Իլիինը, նշելով, որ ստիպողական անգործությունը առաջացնում է անիմաստ դատարկություն, անասելի տխրություն, ժամանակը ինչ-որ բանով լցնելու ցանկություն, որից հետո գալիս է օրինականության ժխտումը և ազնիվ աշխատանքից հրաժարումը [2, էջ317-318]:

Ընդհանրացնելով պետք է ասենք, որ գլոբալացումը իրավամբ կարելի է համարել շուկայական քաղաքակրթության արդյունք, միևնույն ժամանակ պետք է համաձայնվել այն պնդման հետ, որ գլոբալացման սոցիալական էությունը դա «արևմտյան երկրների կողմից պլանավորված հավակնոտ պատերազմ է, որն ուղղված է ոչ միայն համաշխարհային իշխանության ձևավորման համար, այլև

մարդկության էվոյուցիոն գործընթացին տիրապետելու և այն իր շահերին համապատասխան կառավարելու համար[1, էջ452]:

Գլոբալացման ինդիքը ներկայացնելով Հայաստանի Հանրապետության համար, նախ պատասխանենք այն հարցին, թե ինչ կարող է տալ գլոբալիզացիան Հայաստանին: Նախ դիտարկենք դրական կողմը. Գլոբալիզացիան հնարավորություն է տալիս Հայաստանի տնտեսությանը դուրս գալ միջազգային շուկա, իր ազգային արտադրանքը ներկայացնել աշխարհին,ինտեգրվելով համաշխարհային տնտեսական գործընթացներին: Բայց մյուս կողմիցտնտեսական գլոբալացման հետևանքով ավելի դժվար է դառնում երկրի տնտեսական գործընթացների կառավարումը, քանի որ դրանք կախված են միջազգային կազմակերպությունների և վերազգային կորպորացիաների գործունեության ազդեցությունից: Հետևաբար Հայաստանի համար առավել կարևորվում է միջազգային տնտեսական ինտեգրացման և գլոբալացման գործընթացներում արդյունավետ ներառվելը:Հաշվի առնելով, որ Հայաստանը դեռ չի հաղթահարել անցումային շրջանը և չի կարողացել ստեղծել նոր իրավիճակին համապատասխան տնտեսություն, հետևաբար Հայաստանում, ինչպես մյուս անցումային երկրներում արտադրանքի և ծառայությունների մուտքն արտաքին շուկա դժվար է, ուժեղանում է արտասահմանյան ներդրումների համար մրցակցությունը, կատարվում է որակյալ մասնագետների արտահոսք: Հայաստանը Առևտրի համաշխարհային կազմակերպության (ԱՀԿ), ինչպես նաև ԱՊՀ անդամ է և սերտ հարաբերության մեջ է գտնվում Եվրոպական միության հետ, նաև հանդիսանում է Սևծովյան տնտեսական համագործակցության կազմակերպության(ՍՀԿ)անդամ է և դրա հետ կապված մասնակցել է մաքսային հարաբերությունների վերաբերյալ համաձայնագրերի կնքմանը:Միաժամանակ պետք է նշենք, որ Հայաստանը ունի նախադրյալներ գլոբալ աշխարհում ինտեգրվելու համար, որը վերաբերում է զբոսաշրջության զարգացմանը, որը միջազգային տնտեսական կապերի զարգացման յուրահատուկ միջոց է: Տնտեսական տարբեր ապրանքանիշների հետ հայակական բրենդի կարևոր մաս է կազմում նաև մշակույթը(Արշիլ Գորկի, Շարլ Ազնավուր, Վիլյամ Սարոյան և այլն) [8, էջ4-6]:

ԵԶՐԱԿԱՑՈՒԹՅՈՒՆ

Վերլուծելով և ամփոփելով հետազոտական աշխատանքի արդյունքները, պետք է նկատել, որ գլոբալացումը որպես համաշխարհային հիմնախնդիր հանդես եկավ 20-րդ դարի վերջին տասնամյակում, որի մասին չնայած գրվել են բազմաթիվ աշխատություններ, կատարվել տարաբնույթ հետազոտություններ, բայց այդուհանդերձ ոչ մեկին չի հաջողվել ամբողջովին դրական կամ բացասական որակել այդ գործընթացը: Չնայած գլոբալացման արդյունքում պետությունների միջև տնտեսական սահմանները վերացան, բարձրացավ միջազգային համագործակցության մակարդակը, ձևավորվեցին անդրազգային կազմակերպություններ, բայց դրա հետ միասին դրսևորվեցին բացասական երևույթներ, այդ թվում ստանդարտացումը և մշակութային նույնականացումը: Երբ գլոբալացումը դիտարկում ենք ազգային և համամարդկային արժեքների համատեքստում, տեսնում ենք, որ այն խախտում է ազգային ավանդական արժեքները և փոձում ձևավորել համընդհանուր կամ համամարդկային արժեքներ: Մինչդեռ պետք է համաձայնվել այն գաղափարի հետ, որ դա այնքան էլ դրական տենդենց չի կարելի համարել: Այսպես օրինակ. Յուրաքանչյուր երկրի կրթական համակարգի հիմնական առաքելությունը այնպիսի քաղաքացու ձևավորումն է, որն իր մեջ կրելու է իր ազգին բնորոշ արժեքները, ազգային լեզվամտածողությունը, ազգային մշակույթը, իսկ գլոբալացման շարունակական ընթացքը կարող է տանել ազգերի միաձուլման: Իհարկե պետք է նաև ընդունել, որ հասարակության զարգացումը չի կարող ընթանալ միայն հիմք ընդունելով պահպանողական գաղափարները, այլ ժամանակին համընթաց քայլելով, հաղորդակցվելով համամարդկային արժեքներին, առաջնայնությունը տալ ազգային արժեքներին:

ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ

1. Зиновьев А.А. Фактор понимания / А.А. Зиновьев-М.: Алгоритм Эксмо, 2006г.
2. Ильин И.А. Путь к очевидности.-М.: Республика, 1993г.
3. Пиджаков А.Ю. Терроризм История возникновения /Байрамов Ш.Б. Лукин В.Н. и другие Международный терроризм: Вызовы и противодействие в 3 т./Глав. Ред. В.Л.Михеев, СПб «Архей», 2011г. Т.1, История и современность, 2011г.- 383ст.
4. Симония Н. А. Глобализация и проблема мирового лидерства /Н. А.Симония, А.В.Торкунов//Международная жизнь-2013- №3http://russiancouncil.ru/inner/?id_4=1630.
5. The Economist, September 10th, 2011, p.78
6. <https://econs.online/articles/opinions/kak-globalizatsiya-ispytyvaet-demokratii/>
7. http://www.intelros.ru/readroom/credo_new/k3-2013/20016-globalizaciya-i-osnovnye-problemy-chelovechestva.html
8. <http://alternative.am/wp-content/uploads/2017/03/%D4%B1%D5%AC%D5%BE%D5%A1%D6%80%D5%A4-%D5%84%D4%BB%D5%90%D4%B6%D5%88%D5%85%D4%B1%D5%86-%D5%80%D5%A1%D5%B4%D5%A1%D5%B7%D5%AD%D5%A1%D6%80%D5%B0%D5%A1%D5%B5%D5%AB%D5%B6-%D5%A3%D5%AC%D5%B8%D5%A2%D5%A1%D5%AC%D5%AB%D5%A6%D5%A1%D6%81%D5%AB%D5%A1%D5%B6-%D6%87-%D5%80%D5%A1%D5%B5%D5%A1%D5%BD%D5%BF%D5%A1%D5%B6%D5%A8.pdf>